

## 【文殊菩薩示善財文】

爾時文殊師利菩薩告善財童子言。善哉善哉。善男子。若有眾生能發阿耨多羅三藐三菩提心。是事為難。能發心已。復欲勤求行菩薩行。倍更為難。

☆謂但能求友離過。則前問皆圓。於中二。先案定後誠勸。

善男子。汝今發心求菩薩道。為欲成就一切智智。應當勤求真善知識。

◎今初。上令求友不得不決。言善知識者。未知善法能令人知。未識惡法能令人識。或二並通。識約明解。知約決了。瑜伽四十四成就八支為善友相。一戒。二聞。三證。四悲憫。五無畏。六堪忍。七無倦。八善語具。今云真者。為揀似故。具上八義。可得名真。又諸善知識總有五種。一、知識世間善惡因果而令修斷。二、厭世樂而求涅槃。三、有悲心而相心修度。四、以無相慧令物修行。五、無障礙修滿普賢行。此五前前望於後後。皆非是真真。唯第五。人能行此。是人善友。究竟善友。唯是如來。直就五法名法善友。統而徧收教理行果。皆善友也。淨名道品為善知識行善友也。離世間品有十善友。恐繁不引。

善男子。求善知識勿生疲懈。見善知識勿生厭足。於善知識所有教誨。當念隨順不應違逆。於善知識善巧方便。但應恭敬勿見過失。

◎後誠勸。隨順是勸。餘悉是誠。設有實過。尚忘非取法。至聖堯舜其猶病諸。自除如來孰能無過。以人廢道翻是自欺。況權實多端。生熟難測。